

欽定大清會典事例

欽定大清會典事例卷二百八十八

戶部

蠲恤

販運報之限

勸輸

興土功災傷之等

撫流亡

奏

販運 ○雍正三年

諭今歲直隸天津等處地方被水米價甚昂去歲曾令盛京由海道運過糧十萬石著行文該將軍府尹等將盛京糧十萬石仍由海道運至天津新倉俟到日交與地方官收貯盛京等處倉內每年將所貯陳米出糶易進新米若所出陳米不足十萬石即令運來儻不足十萬石酌量以賤價買足十萬石之數運來今

歲若獲豐收。價平即行買運。若價值騰貴。有不便之處。即令將軍等將不便之處奏明。再若有商民自海運米者。不必禁止。聽其運至天津貿易。天津以外。不許他往山東登州等處販賣。○四年

諭。聞山東登青萊三府連年豐稔。商販自東而西者絡繹不絕。著該撫酌量動帑採買。分貯於濟南等屬米少之州縣。再勸諭各商販多運至濟南等三府。俾民間得以收買存貯。則明歲青黃不接之時。米價不致騰貴。○八年議准。行令

盛京將軍奉天府尹轉飭守口官弁。如有商民販

運米穀者聽其出口。該管州縣給予商民船票。該省地方官弁於原票上鈐印填註到口日期。如無鈐印即查究治罪。○十年奏准凡有商賈販運米穀至山東直隸雜賣者米船一到即便放行。其臨清淮揚等關將梁頭米稅自五月至七月暫行寬免。秋收之後再行徵收。○乾隆元年

諭近年以來直隸地方收成歉薄民食艱難從前議開海運以資接濟續經盛京將軍奏稱錦州等處米穀加貴請永禁海運部議准行。比時朕降諭旨今歲直

隸收穫平常。仍照朕旨。明歲再照將軍等所請行。朕聞秋冬收穫之後。各商民攜帶資本。前赴海城。蓋平等處採買雜糧。止因時屆隆冬。海風勁烈。舟楫難行。已將所買米糧收貯各店。春融裝運。該商民惟恐地方有司遵照明年停運之議。閉遏留難。甚為惶懼。朕思商民此糧購買在先。暫行存貯各店。不應在明年禁止之內。且奉天素稱產米之鄉。雖因販運過多。價值視昔加貴。然較之直隸歉收之地。待粟而炊。其情形緩急實相徑庭。著俟明年內地麥熟之後。再將海運禁止。此亦酌盈劑虛。有無相通之道。可即行文傳

諭直隸總督盛京將軍等。並出示令商民知之。○又
議准。行令各省督撫。轉飭管理關務各官。凡有
米船過關。即詢明該商。如果前往被災各邑糶
賣者。免其納稅。給予印票。責令到境之日。呈送
該地方官。鈐蓋印信。以便回空覈銷。如有免稅
米船。偷運別省。並未到被災地方。先行糶賣者。
將寬免之稅。加倍追出。仍照違禁例。治罪。○四
年

諭。上年直隸米糧騰貴。曾降諭旨。准商賈等將奉天米
糧。由海洋販運。以濟畿輔民食。以一年為期。今弛禁

之期已滿。而京師雨澤未降。恐將來民間不免有需之處。聞奉天今歲收成頗稔。著再寬一年未之禁。商賈有願從海運者。聽其自便。可行文直隸總督盛京將軍等知之。○九年奏准直隸省慶雲縣被旱歉收。再展奉天海運限期一年。○十二年

論向來海禁甚嚴。原以防姦商透漏接濟姦匪之弊。但東省上年被水地方。目下賑借各項需用米糧。儻奉天可以通商販運。而稽查嚴密。不致偷越。自於災地有益。著行文詢問山東巡撫盛京將軍。是否可行。奉天糧米可以運往若干。如何按數給照撥運。山東如

何驗照稽查。俾商販流通。不致透漏。而奉天米價。又不致於騰貴。如果可行。一面辦理。一面奏聞。此因山東偏災。一時權宜之事。嗣後不得援以為例。○又奏准福建臺灣雖隔重洋。然與漳泉二府同隸一省。商船民船來往如織。原不在禁例。即如江南之崇明縣。向有給照赴內地買米載回之例。今以海外之米買運內地。與弛海禁者有異。嗣後如遇臺郡豐稔之年。應聽漳泉二府商賈。及在臺之漳泉二府民人。自十月起。至次年二月止。於地方官處請照買運。儻買運過多。以致臺郡

米貴。及臺郡並非豐稔之年。仍令該道府詳報
停止。○又議准暹羅國產米甚多。如有商民願
往該國買米造船運回者。給予牌照。以便驗放。
無阻。仍嚴飭各兵役。毋得需索擾累。若商民無
糧米載回。止載貨而歸者。倍罰船稅。以示懲儆。
○又奏准直隸省天津靜海二縣偏災較重。暫
開奉天海運一年。俟明歲秋收後停止。○二十
五年

諭。教參關繫民食。全資商販流通。源源接濟。市價自就
平減。上年近京收成稍歉。因於京城內外設法分廠

平糶。今臨清關口既常有商船銜尾北來。畿輔左近穀價何以未能大減。恐其中臨河各州縣現因糧艘需備剝運。辦理不善。或藉名多封船車。以致商人輓運不無留滯。病商因而病民。甚有關繫。著派侍郎給事中會同直隸總督。至德州沿河一帶。悉心察看。務令舟車無阻。食貨充裕。稱朕念切民依至意。○三十

一年

諭。向來奉天糧石充裕。准令直隸山東毗連省分就近販運。本年夏間。經將軍奏該處雨水稀少。或恐市集昂貴。曾諭令該督撫將商販暫行停止。今奉天續經

昔得雨澤。仍可一律豐收。將來糧石自必充足。且現在東省歲收稍歉。直隸又因鄰省運販糧價亦未免稍增。商人等如有願往奉省糴運者。尚於事理無礙。設無餘力。勢將不禁自止。若竟概行示禁。恐藉端紛擾。且射利商人保無私行偷販。至少米處所。民食稍有不敷。方且加恩賑濟。廣為籌畫。若得該商等自為販運流通。俾資接濟。於閭閻食用尤為有益。所有直隸山東二省商民販買奉天米石之處。仍著毋庸禁止。○五十七年

諭。連日據吉慶李奉翰等奏。山東各屬均得透雨。本日

穆和簡奏河南之開封歸德河南陳州許州陝州各屬亦於二十五六等日得有對雨三四五寸以至深透不等。是東省各屬及豫省之大河以南甘霖渥被。可冀稔收。將來商販自必前往糴買。爭赴災歉地方出糶。如直隸之南三府及京師左近。麥亦歉收。皆須仰給山東。豫省之北三府亦藉大河以南各府糧食運往接濟。此等商販往來務令聽其自行流通。以有餘補不足。斷不可禁遏運糶。以致歉收地方不能得食。但亦不必官為經理。或有擾累。轉致裹足不前。止須聽商民自便。商販等惟利是圖。聞知糧價昂貴之

區自必趨之若鶩也。○五十九年

諭。河北三府。本係積歉之區。今據穆和蘭奏。晴霽而月。麥苗漸形黃萎。難冀收成。是該處麥秋已經失望。又據奏通省二麥約收分數。其大河以南。雨澤涵濡。合計麥收共有八分。較為豐稔。民食自當充裕。現在直隸省雨澤愆期。麥收歉薄。正可以豫省之有餘。濟直省之不足。穆和蘭當曉諭百姓等。如遇有商民前往豫省販買麥石。務須公平糶賣。不可擡價過糶。俾源源接濟。麥石流通。豫省小民既可糶售得錢。而直省百姓亦可得食。豈不兩有裨益。並咨會所過關津。此

次如有豫省麥船前赴直隸販售者。將應徵稅課量。為輕減。迅速放行。商販等聞知獲利。自必踴躍從事。源源販運。實為兩便。○嘉慶十九年。

諭。各省地方豐歉不齊。全賴商運流通。各就產米贏餘之區。源源接濟。則民食尚不致匱乏。浙省民稠地狹。即遇豐收之年。亦資外來米穀協濟。若因一時米貴。抑勒各鋪戶減價出糶。又以嚴查囤戶為名。索詐擾累。本地殷戶。既不敢多存米石。外省米商。又裹足不前。將來本境之米食盡。明春青黃不接之時。窮黎必致坐困。著顏檢即查明該省歉收情形。市糧價值。斟

酌盈虛。出示曉諭。務俾商販米石源源而來。米糧既多。其價自減。方於民食有益。不可膠柱鼓瑟。止取給於目前。而不通籌全局也。○道光二十七年。奏准河南省販運糧石。惟水路腳費較輕。現已由司撥銀三萬兩。委員由河路分赴南陽光州等處。及山東直隸天津一帶。遇糧價平減處。採買糧石。以船運回。留為開封彰德衛輝懷慶等屬災區減半平糶之用。○咸豐三年。

諭。浙省現當災歉之後。又值長江有警。商販鮮通。民間乏食堪虞。自應設法招徠。以期接濟。所有各省商人。

持照運米赴浙者。無論河運海運。經過水陸各關口。均著免其納稅。以廣招徠而裕民食。○同治十年奏准。直隸省天津等府屬被水成災。現招殷實紳商。給發護照。赴奉天江南山東河南等省產米豐收之區。多方購買。運赴被災處所。按照市價售賣。以期糧價平減。○光緒三年奏准。福建省被水飢民。全賴運米賑濟。現已招商販運。請將閩省米船經過江蘇浙江各關卡。一概免稅。以廣招徠。○又奏准。山西省災歉頻仍。查河東運城地方。商賈輻輳。需糧甚多。現由該處商販湊

集資本分往河南省南陽府之賒旂鎮及安徽
省潁州府六安州連界之陳州府周家口等處
採買糧石。請免釐稅以濟民食。○又奏准廣東
省廣韶等屬被水之餘米價騰貴。現出示招商。
如有願備資本前赴上海鎮江等處買米運回
雜賣者。即由殷實行店具保。由司給發護照。每
照一張限買米二千石。毋許影射夾帶別項貨
物。

勸輸○順治十年覆准士民捐助賑米五十石
或銀百兩者。地方官給扁旌獎。捐米百石或銀

二百兩者。給九品頂戴。捐多者遞加品級。○十一年題准。現任官並鄉紳捐銀千兩。米千石以上者。加二級。銀五百兩。米五百石以上者。紀錄二次。銀百兩。米百石以上者。紀錄一次。生員捐米三百石。准貢。俊秀捐米二百石。准入監讀書。○十二年覆准。令各省地方設廠煮賑。以濟飢民事竣。仍將捐輸官民姓名。並銀米數目。彙冊題報議敘。○十八年題准。凡捐穀。每二石折米一石。豆。照時價計銀議敘。○康熙元年題准。捐銀米不分本屬隔屬。如一年內捐及額者。題請

議敘。○七年覆准滿洲蒙古漢軍並現任漢文
武官弁捐輸銀千兩或米二千石者加一級銀
五百兩或米千石紀錄二次銀二百五十兩或
米五百石紀錄一次進士舉人貢生捐銀及額
出仕時照現任官例議敘生員捐銀二百兩或
米四百石准入監讀書俊秀捐銀三百兩或米
六百石亦准送監讀書富民捐銀三百兩或米
六百石准給九品頂戴捐銀四百兩或米八百
石准給八品頂戴○八年題准停止督撫捐助
議敘之例○三十四年

諭自天津兩次運送盛京米糧。所到日期甚速。大有裨益。兩次運米官。捐輸官。均著議敘。欽此。遵

旨議定。郎中同知。通判。州同。及八品筆帖式等官。各加一級。其捐輸腳價商人。該督酌量獎賞。○六十年。覆准。山陝被災地方。紳衿富戶。並內外現任官。願捐米者。計官職之大小。捐米之多寡。具呈該地方官。照數收捐。出給實收。隨收隨報。督撫題明。轉咨吏部。遇有缺。即升富戶。題明破格。旌獎。○又覆准。令各省督撫。遇有轉徙飢民。米至境內。地方官並富民人等。有情願捐貲養贍。全

活多人者。督撫覈實題薦。從優議敘。○雍正十

一年

諭。聞上年秋月。江南沿海地方。海潮泛溢。蘇松常三府。近水之人。遭值水患。其本地紳衿士庶中。有雇覓舟楫救濟者。有捐輸銀米煮賑者。今年夏間。人有时症。紳衿人等。又復捐輸方藥。資助米糧。似此拯災扶困之心。不愧古人任恤之誼。風俗淳厚。甚屬可嘉。著該督撫宣旨褒獎。仍遵前諭。將捐助多者。具題議敘。少者。給予扁額。登記冊籍。免其差徭。並造冊報部。○乾隆二年。覆准。被災貧民。該地方富戶。如有出資

安插不致流離失所者。該督撫查明富戶用過銀米實數。作何優賞之處。即於題銷賑濟銀米疏內分別議奏。以示獎勵。○五年議准。鹽商於地方偏災樂為捐賑者。聽其自便。若糾結公捐。而暗增成本。借名取償者。查究失察之該管官。並予議處。○十三年

諭。朕覽山東通志內。恭載

皇祖諭旨。東省小民。皆依有身家者為之耕種。豐年所得者少。凶年則己身並無田產。有力者流於四方。無力者即轉於溝壑。此等情狀。東省大吏庶僚。及有身

家者。若能輕減田租。以各贍養其佃戶。不但深有益於窮民。即汝等田地。日後亦不致荒蕪。

訓諭諄諄。誠切中東省民生利弊也。今朕省方問俗。親見民情風土。歲偶不登。閭閻即無所恃。南走江淮。北出口外。揆厥所由。實緣有身家者不能贍養佃戶。以致資身無策。動輒流移。夫睦婣任恤。自古為重。利豈專在窮乏。富戶均受益焉。轉徙既多。則佃種之人少。鞠為茂草。富者不能獨耕也。若有無相資。使農民不肯輕棄其鄉。即水旱無虞。大困貧固。資富之食。富亦資貧之力。不計其食。而但資其力。窮民復何所圖。繼

自今該撫董率郡縣有司實力稽查勸諭務使曉然於貧富相維之道俾閭里通周急之情斯黎民享安土之樂朕於東省有厚望焉○十六年

諭浙省溫處等郡米貴降旨加意撫綏已據該督撫前後奏准撥運鄰省倉穀陸續平糶並招徠商販特免商稅俾米穀流通民食充裕但思窮黎待哺孔殷外來商販雖已雲集而山鄉僻壤市販未必盡敷本地有穀之家或能以任恤為心出其所餘照官價一例平糶更足以助官糶之所不及雖零星積聚豈能如官倉足給衆人之求然隨鄉分糶於民食亦殊有濟

在富民推其贏羨。嘉惠桑梓。孰無此心。惟是刁悍乘機。或短予價值。或冒領告貸。甚或倡眾搶奪。種種不法。遂致富民間風相戒。以為善不可為。茲特諭各該督撫。凡遇地方水旱。米價騰貴。即應明切曉諭。以天時水旱不齊。偶值偏災。無不飛章入告。立即隨時籌畫。百姓惟當安分奉法。靜候施恩。若藉端生事。轉罹罪愆。有負國家之德惠。其能敦任恤。而出糧平糶者。地方官為之主持。實力稽查。遇強橫滋事之徒。速即嚴行懲處。務令姦匪斂迹。富民無所顧慮。則窮黎受惠多矣。所有平糶富民。計其所糶之數。照樂善好施。

例優加議敘以示獎勵。○四十一年議准紳衿士民有於歉歲出資捐賑者准親赴布政司衙門具呈並聽自行經理事竣由督撫覈實捐數多者題請議敘少者給予扁額若州縣官勒派報捐或以少報多濫邀議敘者從重議處土豪胥吏於該戶樂輸時干涉漁利者依律查究。○五十年

諭安徽省安慶廬州等府屬被旱成災該處紳士誼敦任恤減價出糶甚屬可嘉著該撫查明照例賞給議敘至江西四川二省俱已遵照節次所降諭旨設法

調劑俾商販通行無滯。各災區自當米糧匯集。市價日就平減。○五十一年

諭。江夏等州縣被旱成災。該處紳士誼敦任恤。減價出糶。甚屬可嘉。著該督撫查明奏聞。交部照例賞給議敘。○嘉慶六年

諭。淮商等請借撥鹽義倉穀。運赴漢口。煮賑貧民。漢口為淮商行鹽之地。情同桑梓。該商等現因米價稍昂。情願於鹽義倉借穀十萬石。運赴該處設廠煮賑。洵屬急公可嘉。著咨部議敘。○十一年

諭。晉省河東上年被旱成災。各州縣現需將省北米石

運集平陽。再分撥各州縣。程途遙遠。運費較繁。該紳士等誼篤桑梓。報效情殷。著照所請。將所捐銀米全行賞收。分別應用。所有捐職郎中議敘四品頂戴王濡翰等。急公慕義。實屬可嘉。著交部照例議敘。以示獎勵。○道光十三年

諭。直隸災歉地方。自去冬捐資煮粥。收養貧民。灤州等三十七州縣。勸捐糧食。自數百石至數千石不等。勸捐銀錢。自三四千串至萬餘串不等。天津一縣。計捐銀至五萬餘兩有奇。該紳民等踴躍輸將。深堪嘉尚。著擇其捐輸最多者。據實具奏。○咸豐六年

諭京倉情形現甚支絀必須豫為儲備著慶祺等趕緊
勸捐廣為收買並著桂良出示剴切曉諭附近水次
各州縣勸諭捐輸米石所有一切收捐事宜責成長
蘆鹽政遵照辦理仍湊足五千石之數由該鹽政奏
請獎敘一次○光緒三年奏准直隸省滄州地方上
年被旱失收經富紳捐助糧石按戶散放計極
貧男婦二萬一千三百餘人每人給糧四升應
予旌獎以資觀感○又奏准江蘇省海州阜甯
鹽城等州縣歲荒民飢沐陽尤甚現經上海紳
商集銀一萬二千餘兩解赴沐陽散放請按災

賑成案。給予獎敘。

興土功。康熙三十一年。

諭。運送潼關米十五萬石。為數甚多。又鄖陽山路崎嶇。難於輸輓。著停止鄖陽運米。將襄陽等處米穀運送十萬石。其運送事宜。遣部院堂官一人前往管理。所運米皆現給腳價。如陝西流民在襄陽等處地方。有情願運米者。著即給價令其運送。既可以濟轉輸。亦可俾流民還籍。五十三年。覆准。令陝甘各州縣修城。俾窮民得以傭工度日。雍正四年。

諭。朕軫念東省被水窮民。粒食維艱。特允山東巡撫之

請於大清河興疏濬之工。今乏食小民得力役之資。為餬口之計。今天氣和暖。土脈鬆潤。正施耒鍤之時。去秋該撫奏請設廠賑濟。今赴工者衆。粥廠可以停止。但念此就食小民。其中豈無老弱殘疾不能赴工者。煮賑既停。麥秋之期尚遠。此輩窮無所歸之人。或仍致失所。朕心深為憫焉。著山東巡撫將不能赴工之窮民查明若干。每日仍給予升合之資。候至麥收後停止。所用銀均作正項開銷。該撫嚴飭各州縣官務實心奉行。以副朕養育百姓之至意。○乾隆二年

諭今年春夏之交。直隸山東兩省雨澤愆期。二麥歉收。

朕已多方籌畫。接濟民食。且令直隸總督有應興工
作。以次舉行。俾小民得藉營繕以餬其口。今思山東
百姓多仗二麥度日。今歲麥秋收穫既薄。雖屢降諭
旨。蠲賑平糶。仍恐閭閻尚有艱食之虞。著該撫悉心
計議。如開渠築隄。修葺城垣等事。酌量舉行。使貧民
傭工就食。兼贍家口。庶可免於流離失所也。再年歲
豐歉。難以懸定。而工程之應修理者。必先有成局。然
後可以隨時興舉。一省之中。工程之大者。莫如城郭。
而地方何處為最要。要地又以何處為最先。應令各
省督撫一一確查。分別緩急。豫為估計。造冊報部。將

來如水旱不齊之時。欲以工代賑。即可按籍而稽。速為辦理。不致遲滯。於民生殊有裨益。○十三年

諭

山東興修沂河兩岸隄工。該部議照以工代賑之例。土方工價。准給一半。乃係向來成例。自應照此給發。惟是東省被災甚重。其民情之艱窘。實非他處可比。若拘常例給發。恐赴工之民。仍不足以餬口。著加恩。將此項土方工價。按數全給。俾其食用有資。○二十五年

諭 上年截留北倉漕米。尚存十萬石。現在直屬有應修河道溝渠等工。刻下正值青黃不接之時。工次小民。

買食未免拮据。著加恩將此項米石作為修濬河渠以工代賑之用。○二十七年

諭。近來朝陽廣甯等門繕修石道。官民均為便利。惟德勝門外至清河一帶。地勢低窪。一遇大雨時行。遂多泥濘。此時積水雖消。而車馬往來尚多未便。現在物價較昂。未必不由於此。著步軍統領衙門派員妥協修治。其餘各門或有未能平坦。不便行旅之處。並著查勘酌量辦理。多興土功。亦所以養窮民也。○四十

七年

諭。豫省青龍岡堵築漫口。合龍尚須時日。其下游一帶

居民經黃水淹浸。民食維艱。現在該省另籌開挑引河。改建隄岸。江南山東兩省附近災黎。踴躍赴工。目前計工授食。即可以工代賑。○五十七年

諭。本年直隸省被旱較廣。經朕先事綢繆。截漕緩徵。並借糶煮賑。所有救荒之策。已無不豫行籌備。今保定天津河間以及順廣大等府。既有應修城垣。乘此興修。貧民得以藉工代賑。免至外出。著查明各該州縣城工。如有應行急修之處。趕緊勘估。奏明辦理。○嘉慶元年

諭。本年湖北各屬。因漢江漲發。猝被水淹。荊門災形較

重該處隄工。原係百姓自衛田廬。例應官督民修。第
念楚省教匪滋事之處。既被擾累。其未經被賊地方。
又復猝遇水災。殊為可憫。著加恩將此次隄工。官為
修理。以工代賑。○六年

諭。救荒之策。莫善於以工代賑。因思附近城河等處。久
未挑濬。多有淤滯。以致驟雨不能消涸。著通行查勘。
將應行疏濬之處。雇集附近窮民。興工挑挖。於工賑
兩有裨益。○又

諭。石安永定各門外。被水難民。屋宇淹浸。無可棲止。雖
經賑濟口糧。難以支持日久。現在永定河東西兩岸。

決口趕緊興工堵築。所有被水民人。正可前赴工次。幫同力作。官給傭資。足充口食。○十五年

諭。甘肅固原等各州縣。均有應修城工。業經報部。除涇州等處。尚可從緩興修。惟皋蘭固原二處。城身皴裂。亟宜趕修。本年該處田禾被旱。現雖加恩賑濟。而來春青黃不接之時。必須豫為籌畫。著於來年開凍後。即行修理。皋蘭固原二處城工。以工代賑。俾貧民得資餬口。○道光二十二年。奏准江蘇省桃源等各州縣被水。明歲堵築口門。今春挑挖引河。均擬以工代賑。撫恤災黎。○二十八年

諭本年湖北災區寬廣。有隄各屬應需撫賑銀兩。移賑歸工。以工代賑之處。著照議妥辦。○又

諭本年安徽省江淮異漲。圩隄漫缺成災。前經該撫奏

明寓工於賑。茲據奏稱積水消退甚遲。工賑勢難兼顧。自應酌量變通。以示體恤。所有該處勸捐積有成數之處。准其先於隆冬按極次貧民散放。以代賑濟。即以前所省冬賑銀兩。存俟積水全涸。彙同春賞口糧散給貧民。以為築圩之用。○咸豐元年奏准南河豐北。自上年決口。鴻墩遍野。現在業已開工。招集災民。以工代賑。免致流離。○三年奏准安徽省

宿州城垣傾圮。現以所放一月口糧銀一萬八千兩。作為修城濬濠增置敵臺之費。俾飢民趨赴作工。以資口食。○同治五年。奏准山東省濮州地方被水災。黎蕩析離居。其城北金隄歲修之費。即寬為籌備。趕緊興修。以工代賑。○八年。奏准安徽省沿江各屬隄岸。現被大水衝決。必須及時興修。免誤春耕。茲於茶捐項下撥銀四萬兩。乘此冬令水涸。招集災黎。趕緊興工。以代賑恤。○十年。奏准永定河決口。被水災民。四出求食。請由部庫借撥銀十萬兩。解交工次。俾作

賑恤。○光緒二年奏准。江西省南豐甯都興國等州縣。山水陡發。衝決壩隄。濱河村莊。胥成澤國。酌量借款。修隄於地。丁等款內。陸續借給南昌。新建。豐城。星子。德安。清江。新淦等縣。銀七萬餘兩。由各該縣轉發各隄紳董業戶具領。並委員督催興工。以代賑恤。○三年奏准。江北飢民紛紛過江。恐致滋生事端。現委員估濬鹽阜高寶等處河道。以工代賑。

撫流亡。○康熙四十三年

諭。朕因山東流民流入京城者甚多。特命大臣官員設

飯廠數十處。分行煮賑。近見直隸河間等府百姓來
赴賑廠者甚衆。雖目前逐日散給。究非長策。若不早
令回籍。必致坐誤農時。廢棄本業。今山東省飢民已
遣官分送回籍。直隸總督可將所屬各官內。作速選
擇賢能者。前來京師。將流移人民。悉行收領。俾各回
原籍。仍捐給籽粒。令得耕種田畝。無失生計。如此則
飢民庶不致仳離流散矣。○雍正元年

諭。直隸山東河南流民。有就食京師。不能回籍者。著五
城御史查詢口數。量給盤費。送回本籍。毋致失所。欽

此遵

旨議定。每口每程給銀六分。其間有老病不能行走者。每口每程加給三分。以為腳力之費。委官護送。一面行文直隸山東河南巡撫飭令地方官逐程出具收結。轉送至原籍。若有中途患病者。令地方官留養醫治。俟病痊之日。再行轉送。毋致失所。○九年議准直隸山東河南三省窮民。因秋成無望。渡河而南。以圖就食。令沿河州縣於各渡口詳加查詢。所過地方有力不能自達者。量給路費。仍知照各州縣安插。如有親朋可依。得以傭工易食者。聽其自便。其乞食者。用截漕。

米糧照例計口賑給。其聞家鄉得雨欲回本籍者。即資給遣回。不願即歸者。於來春耕種之候。仍皆給以資糧。令其回籍。凡資給之費。照例動用存留公項。造冊送部。如有浮冒剋扣等弊。指名題參。○乾隆四年

諭。今歲河南被災頗重。江南亦有歉收之州縣。聞豫省及上江民人。貧苦乞食。轉徙道路。有前往九江口。而官吏禁止。不許渡涉者。此雖得之傳聞。未必不確。著河南安徽巡撫。悉心體察。安輯撫綏。毋致流移失所。儻已離本鄉。行至他省。彼地督撫。即應飭令有司設

法救濟免於凍餒於春暖時資送回籍毋得膜視或他處有似此出境覓食人民亦照此辦理○七年

諭

今年上下兩江水災甚重朕宵旰憂勞百端籌畫以拯吾民之困阨但思此等窮民在本地引領待賑者固多而攜家四出覓食於鄰省鄰郡者亦復不少著江南及河南山東江西湖廣等省督撫各嚴飭地方有司凡遇江南災民所到之地即隨地安頓留養或借寺廟或蓋棚廠使有棲止之所動用該處常平倉穀計口授糧據實報銷並訓諭約束不得藉端生事至於災民聚集衆多之處則更委道府大員專行督

察及冬月水消春初耕種之時。有願歸本鄉者。即資送回籍。知照本籍照例安插。並給以麥種。俾得及時趕種。其不願回籍者。亦不必強。悉遵前諭行。○十一年議。唯奉天流寓乏食窮民。照資送流民回籍之例辦理。將支給花名。動用銀數。報部查覈。○

十三年

諭向來外省有資送流民之例。蓋因地方小有旱澇。而愚民輕去其鄉。以致拋棄室廬。荒蕪地畝。是以國家施恩格外。酌途路之遠近。計人口之大小。差委官役護送還家。使復故業。用意良厚。然至饑饉洊臻。本處

米糧實已乏絕而鄰封尚可覓食。不得不扶攜奔赴。苟延性命。此等嗷嗷待哺之氓。若必驅還故里。豈能坐以待斃。勢又將顧而之他。南北東西。輾轉資送。在鄰省既不勝其煩勞。而於災民轉益流離。夫所廷臣中嘗有以此入告者。朕思災輕之地。不可令其拋棄夫業。自當照例資送。儻遇積歉之年。本處無以餬口。轉徙他鄉。或倚託親舊以濟其乏。或傭工種佃以食其力。且其中極無倚賴者。國家復有留養之例。是惟在地方官憫其流移之苦。無分畛域。隨宜安插。俟災氣平復。土地可耕。然後使回故里。勞未安集。加意撫

綏亦未始非權宜之道。惟在權其輕重。相其緩急。斟酌辦理。未可執一而論。山東去年被災甚重。朕屢次加恩賑恤。發帑截漕。費已不貲。而尚不免流移。若近省督撫。仍復拘例飭令資送。實於災民無益。應令地方有司。就所至之境。酌量妥協辦理。如有親舊可依者。聽其自為謀食。其或無所倚靠。即為撫留。設法安插。不必拘定成例。嗣後凡有災重之區。飢氓外出。為督撫者。皆當體朕恫瘝一體之意。善為安輯。俾令得所。依歸。可即行文各督撫等知之。○十八年

諭 御史奏請救諭江南鄰省督撫。照舊例留養流民。奉

融資送回籍等語。留養流民之法。前曾行之。有名無實。轉滋多事。且於災民實無裨益。導之使輕去其鄉耳。近日督撫已經具奏。故未准行。蓋與其留養於異方。何如厚加賑恤。使不流移轉徙之為愈。今年淮徐等處被水。朕疊次降旨。多方籌濟。截漕撥餉。不惜數百萬帑金。加恩撫恤。以留養資送之費計之。何啻百分之一二。豈有愛焉。若有留養資送所需。增為本地賑濟。豈不更虛實惠乎。夫以災地專委多員。挨戶查賑。尚恐不能一無遺漏。鄰省州縣各有應辦事務。又何從辨其災黎。徒滋姦民在本地則乘機混冒。及資

送則聚衆強搶去而復返。日不暇給。而實在被災流民。或依傍親屬。或備工餬口。又必逐一稽留安插。於伊等生計益致拘礙。故停止此例。○二十八年

諭

御史奏資送貧民回籍議覆一摺。以此例一開。恐致無業之徒。混冒虛糜。於災黎無益。是僅推其流弊。而未深究夫有名無實之本源。無識者將未免仍疑為節省帑項起見。非朕軫念窮氓熟籌調劑之苦心也。從前臣工等奏請資送回籍。曾經降旨允行者。原因此等災民。如果本籍自有田廬。固不當聽其播遷。夫業。今經日久。體驗流民中遠出謀生者。悉係故土並

無田廬依倚之人。而必押令復還。即還其故鄉。仍一
無業之人耳。且無論一領路資。潛移別處。去而復來。
有何查驗。即責地方有司。實力奉行。則必押解。濫及
無辜。亦非政體也。朕因直屬兩年秋霖過多。加恩蠲
賑。不啻再三。又念京師為五方聚處之會。今五城加
廠。平糶給賑。即費正供鉅萬。無所靳惜。又何有於區
區資送之一節。然已洞悉其一無實濟。而猶曲徇陳
言。矯情示惠。必不出此也。且流民故鄉。既無生計。四
出傭趁。即揆之古人無常職。轉移執事之條。未始不
可俾之並生並育。又何至束縛驅策。強以勢所不能

堪朕以為與其資送無實際。不如加賑濟之期。俾民獲實惠為愈也。救荒無奇策。惟以體恤民隱為要。設令被災至重。甚至有田之戶。亦概遠徙。則所以籌撫綏。必更有大設施者。又豈恃此資送虛文。所能濟其萬一哉。將此通諭中外。使明知朕意。○嘉慶十九年諭。御史胡承珙奏稱。安省地方官。於他處趁食飢民。不加收恤。致令轉徙於道。該飢民等。離鄉既遠。又不能聞賑。遂歸。且有原籍有田可耕。而力量不能歸里者。請資遣還鄉等語。流民攜家遠出。蕩析離居。地方官極當資遣還鄉。俾安井里。迨既歸原籍之後。尤需一

律補賑。庶資口食。况現在雨雪調勻。明年麥收可望。該流民不皆無業之徒。其原籍地畝。有已經種麥者。回家可望春收。未經種麥者。亦可補種雜糧。該撫職任封圻。當此歲歉。民貧流離滿目。忍不實心妥辦。以副朕安民保赤之誠耶。○道光二十年奏准。現查得湖北省江夏等州縣。逃戶已回者共九千八百三十五戶。未回者共五千八百五十八戶。已回者。逐戶安撫。未回者。分開鄰境。設法招徠。○二十七年議准。州縣所轄災民。結伴出境。為鄰屬送回者。記過一次。甫經送回。未能安撫。仍成羣。

出境者每起記大過二次。外來災民過境未及查出截留者每起記過一次。本境匪徒冒災遠出滋事者每起記大過一次。鄰省鄰屬冒災匪徒在境未能拏辦者每起記過一次。護送災民人少中途失散者每起記過一次。災民數多不按定三十名為一起咨送致令逃散者每起記大過一次。記過至八次以上記大過至五次以上均另行嚴參。儻湖北下游州縣災民出境過境經江西安徽上游州縣查出咨送者每次記功一次。拏獲鄰省鄰境冒災滋事匪徒審擬斬

絞遣軍流徒者。每起記大功一次。記功至八次以上。記大功至五次以上。俱從優獎勵。功過准其相抵。前後接算。若該州縣所管民人。冒災聚眾為害。能自拏究者。止准記過。毋庸記功。○咸

豐三年

諭。現在賊匪竄擾南省。難民流離失所。經過地方。該督撫等自應設法撫綏。早為資遣。若任其轉徙無歸。人數眾多。即恐有姦徒溷迹其中。別生事端。畿輔重地。尤宜整肅。不可不嚴加查察。以詰姦慝而恤窮黎。嗣後外省流民。一入直隸省交界。即著該督飭令地方

官隨時資遣。今回本籍。其現在京城內外流民。著步軍統領順天府五城一體稽察。妥為安插。或設法遣歸。不得互相推諉。聽其流徙。○同治二年

諭

東南新復地方。所有婦女及老弱廢疾窮民。湯火餘生。顛連困苦。即予以田畝。亦不能耕作謀生。著曾國藩左宗棠李鴻章加意撫恤。飭令所屬各地方官。多設收養處所。籍其姓氏里居榜示。俾其親屬得以認領。至收養之資。酌撥正款。是否可行。或先行借撥正款籌辦。一面倡率勸捐。或即行倡捐辦理之處。均由該督撫等酌量妥籌。總期於難民中之婦女及老弱

廢疾者得邀撫恤不至南離水火仍復流亡用副軫念災黎至意。○光緒三年奏准上年江北飢民流至蘇州者分廠留養已有八萬餘名口現擬於二月間將各災民委員分起押送回籍。○又奏准安徽省外來飢民為數甚多現值東作方興飭各屬妥為資送回籍毋任逗遛。○四年

諭直隸河南山西陝西各省被災飢民四出就食現在春耕伊邇若令有業之民久羈在外深恐荒蕪田地無以謀生著各該省督撫仿照上年江南救荒成案飭屬於賑務告竣後將各處飢民妥為資

遣回籍。庶不至有誤耕斯。其無力種田者。並著將各州縣所存倉穀酌給籽種。俾資耕作。○又奏准直隸省被災地方。連次得雨。正可及時歸耕。現咨照五城御史查明來京之保定。河間。正定。三府。及深冀兩直隸州所屬災民籍貫村莊。由順天府添給護照。委員送出境外。大口日給京制錢二百文。小口減半。出境後計其到籍程途遠近。總給路費。分為東西兩路。按日分起行走。○又奏准河南山西兩省在京流民一律各給路照。按日分起行走。凡直隸山東兩省災民。不論

大小名口。各加銀一兩。山西。河南。陝西。三省災民。各加銀四兩。以為回籍資本。並懇

恩賞銀二萬兩。俾資散放。

奏報之限。○順治六年定。地方被災。督撫巡按。即行詳查。頃畝情形具奏。○十七年覆准。直省災傷。先以情形入奏。夏災限六月終旬。秋災限七月終旬。州縣官遲報逾限一月以內者。罰俸六月。逾限一月以外者。降一級調用。二月以外者。降二級調用。三月以外者。革職。督撫司道府官。以州縣報到日為始。如有逾限者。照此例處

分仍限一月內。續將報災分數勘明。造冊題報。各官如有違限者。亦照前定例議處。永著為例。

○康熙四年題准。州縣以被災情形申報布政使。如布政使違限。亦照道府州縣官例處分。

○六年題准。各旗報災。不得過七月二十日。○七年題准。各旗災地遠近不一。難以徧驗。准寬至八月初十日。逾期不准。○十五年議准。被災地方撫司道府州縣官。遲報情形及遲報分數逾限半月以內者。罰俸六月。一月以內者。罰俸一年。一月以外者。仍照從前定例議處。○又議准。

勘災不委廳官印官。仍委教官雜職查勘。或妄報飢荒。或地方有異災不申報者。原委官罰俸一年。若止報巡撫不報總督。及報災時未繳印結冊內不分析明白者。罰俸六月。督撫照例處分。雍正六年議准。一月內造報被災分數。為時太迫。嗣後造報分數勘災之官。寬以十日。查覆上司。寬以五日。總以四十五日為限。其勘災監賑官所有

欽部事件。准照入關之例扣限。又議准州縣地方被災。該督撫一面題報情形。一面於知府同知

通判內遴委妥員。會同該州縣迅詣災所履畝。確勘將被災分數。按照區圖村莊分別加結題報。其勘報州縣官扣除程限。統於四十五日內。勘明題報。如逾限半月以內。遞至三月以外者。議處。○乾隆二年題准。地方偶遇水旱災傷。督撫一面題報情形。一面遴委大員親至被災地方。董率屬官酌量被災情形。視其飢民多寡。先發倉廩及時賑濟。仍於四十五日限內題明加賑。俟賑務告竣之日。將賑過戶口需用米糧造冊題銷。其被災項畝分數。即於勘災之日覈實。

諭

保結。隨疏聲明。至應免錢糧數目。於具題請賑之日起。再扣限兩月造報。○五年議准。地方報災之後。該管官若將所報災地。自為荒地。不令趕種。留待勘報分數。致誤農時者。議處。○六年形亦復不一。雨澤稍愆。則高阜之地。防旱。雨水既足。則低窪之地。慮淹。總期先事豫籌。始可有備無患。言念及此。雖當豐稔之年。而朕宵旰憂勤。實不敢暫釋於懷也。向來各省報災。原有定期。若先期題報。便不合例。朕思按期題報者。乃指具本而言。至於水旱情

形為督撫者察其端倪。早為區畫。隨時密奏。則朕可
倍加修省。而人事亦得以有備。若過拘成例。則未免
後時矣。至於督撫之報災。有故為掩飾。不肯奏出實
情者。亦有好行其德。希冀取悅於地方者。惟公正之
大臣。既不肯匿災以病民。亦不肯違道以干譽。外此
則不能無過不及之失。朕恫瘝在抱。再四思維。匿災
者使百姓受流離之苦。其害甚大。違道干譽。雖非正
理。以二者較之。究竟此善於彼。寧國家多費帑金。斷
不可令閭閻一夫失所。此朕之本念也。各省督撫。皆
當仰體。隨時留心。以副朕惠鮮懷保之意。○七年議

准甘肅省地處極邊。節候甚遲。河西一帶尤覺
山高氣冷。收成更晚。且風氣與內地不同。受災
之田不止水旱。兼有冰雹風沙蟲丹霜雪之患。
應於定例外稍加變通。河東之鞏昌蘭州二府。
河西之甯夏西甯甘州涼州四府。直隸肅州並
口外安西靖遠三廳。僅夏秋二禾。於六九兩月
內被災。仍照定限申報。其有六九兩月田禾在
地本屬青蔥。而此後忽被災傷者。准其各展限
半月。夏災不出七月半。秋災不出十月半。即為
勘明申報。仍將被災日期。於題疏內詳悉聲明。

以便查數。○十二年議准。州縣勘報續被災傷分數。其原報被水被霜被風災地續災較重。距原報情形之日。未過十五日。不准展限。統於正限內查勘。請題十五日以外者。准於正限外展限二十日。如已過正限。均准另起限期勘報。○

嘉慶十六年

諭向來各省偶遇水旱偏災。由該督撫報明分數。降旨分別蠲緩。其各省蠲免。以奉旨之日為始。奉旨之後。部文未到以前。已輸在官者。准作次年正賦。惟奉旨日期。以及蠲免分數。村野小民。無由周知。而不肖官

吏藉以因緣為姦。或於部文未到之前。催比更急。私
圖肥己。且有姦猾書役。藉名墊納。加倍索償等情。即
各督撫頒示恩旨。通諭州縣。而各州縣尚有隱匿不
急為懸挂者。嗣後著各督撫飭令各州縣。遇恩旨頒
到之日。即將奉旨日期。徧行曉諭。並刊刷實徵額冊
串票等。註載明晰。俾小民得知。蠲免分數。官吏無從
欺隱。務期實惠及民。以副朕愛育黎元至意。○二十
一年議定。甘肅省偶被偏災之區。應於該年冬
間。出借口糧者。該督於九月據奏。應次年春間
出借籽種口糧者。於年前十一月內具奏。歛收

處所於青黃不接之時應酌借口糧者於二月內具奏如計程不誤限期照常差人齎送儻民食孔亟准其由驛具奏儻州縣道府詳報數轉遲延查明分別嚴叅○咸豐四年

諭嗣後遇有災歉緩徵務當詳晰分數於十月內奏到以符定限

災傷之等○順治十年

諭京城內外該部確勘被災戶口據實登報直隸督撫凡有災傷地方勘明分數奏請賑恤○又題准報災之法著令督撫速覈分數馳奏○又覆准江南

浙江等省各屬旱災。被災八九十分者免十分之三。五六七分者免十分之二。四分者免十分之一。有漕糧州縣衛所。准令改折。○十六年覆准報災地方。督撫遴選賢能道府廳官履畝踏勘。不得徒委州縣。○十八年覆准八旗旱澇地畝。遣各部侍郎以下該旗副都統以上官率戶部司官筆帖式。至被災地方。該佐領領催指明勘驗。若造冊外漏。責在部院筆帖式。冒指地畝。責在佐領領催。其災傷輕重地勢高下。不詳加踏勘。責在差往大僚。事發照例察議。○康熙四

年定八旗遇災地畝停遣副都統等勘驗止令
驍騎校領催等詳勘保結送部具題○十六年
覆准陝西省疊遭荒亂十五年正賦涇州等處
免九分崇信等處並鹽茶廳免八分莊浪縣免
七分甯遠等縣免六分通渭縣免五分伏羌等
縣免四分所屬學租銀亦照分數蠲免○雍正
六年

諭君民上下之間休戚相同本屬一體論語曰百姓足
君孰與不足是民間之生計即國計也自古人君有
不恤民之災濟民之困者無此情理而至於歉歲蠲

免之數。往往多寡不同者。則時勢贏絀為之。出於不得已也。如明洪武時。凡水旱地方。稅銀即予蠲免。成化時。被災之地。以十分為率。減免三分。宏治時。全荒者。免七分。九分者。免六分。以是遞減。至被災四分。免一分而止。我朝順治初年。凡被災之地。或全免。或免半。或免十分之三。以被災之輕重。定蠲數之多寡。順治十年。議定。被災八九十分者。免十分之三。五六七分者。免十分之二。四分者。免十分之一。康熙十七年。議定。歉收地方。除五分以下不成災外。六分者。免十分之一。七分。八分者。免十分之二。九分。十分者。免十

分之三。此例現在遵行。凡此多寡不同之數。或旋減而旋增。皆因其時勢為之。亦非先後互異。意為損益也。嘗見地方有司。每不願蠲免太多者。蓋恐蠲免並減其耗羨。不利於己耳。此貪吏之見也。朕嘗謂若於蠲免之時。有所吝惜。而平日不能禁官吏之侵漁。是將災黎之脂膏。飽姦貪之慾壑矣。數十年來。雖定三分之例。然

聖祖仁皇帝深仁厚澤。愛養斯民。或因偶有水旱。而全蠲本地之租。亦且並無荒歉。而輪免天下之賦。浩蕩之恩。不可勝舉。而特未曾更改舊例者。蓋恐國家經

費或有不敷。故仍存成法。而加恩於常格之外。即朕即位以來。清理虧空。剔除弊端。數年之中。庫帑漸見充裕。用沛特恩。將蠲免之例。加增分數。以惠蒸黎。其被災十分者。著免七分。九分者。著免六分。八分者。著免四分。七分者。著免二分。六分者。著免一分。將此通行各省知之。○九年題准。八旗災地。各該佐領具結報都統。差旗弁察勘。赴部呈告。部委司官驗實具題。○乾隆元年

諭。各省地方。偶有水旱。蠲免錢糧。舊例被災十分者免錢糧十分之三。八分七分者免十分之二。六分者免

十分之一。雍正年間我

皇考特降諭旨。凡被災十分者免錢糧十分之七。九分者免十分之六。八分者免十分之四。七分者免十分之二。六分者免十分之一。實愛養黎元。軫恤民隱之至意也。朕思田禾被災五分。則收成僅得其半。輸將國賦。未免艱難。所當推廣。

皇仁使被災較輕之地。畝亦得均霑恩澤。嗣後著將被災五分之處。亦准報災。地方官查勘明確。蠲免錢糧十分之一。永著為例。○三年題准。民間起火之家。撲救不力之地方官。照例處分。其延燒之戶。該督

撫確勘實在被火情形分別酌給應賑銀數。動用存公銀報部查數。○五年議准。夏月被災。如秋禾種植將來可望收成者。統俟秋穫之時。確勘分數。另行辦理。其間或有得雨稍遲。播種較晚。必須接濟者。令該督撫酌量。或借籽種。或貸口糧。秋後免息還倉。○又議准。冰雹為災。舊例有貸無賑。續經定例。一律賑恤。且損傷禾稼。多在夏月。令地方官查勘情形。統照夏災定例辦理。○六年覆准。甘肅省邊徼氣寒。土地磽薄。民間種植。就其土宜。分種夏麥秋禾。而一地之內。

既種夏禾。則不能復種秋禾。播種秋禾。則不能
先種夏禾。若夏禾既經被災。則已終歲失望。如
必俟秋穫之時。始行查勘。統辦災戶。不能久待。
嗣後甘肅夏禾。儻遇災傷。督撫勘明。可否復種
秋禾。應否量加賑恤。題明辦理。○七年議准。一
方被災。若秋禾已種齊全。可望收穫者。統歸秋
成辦理。若種植止有一季。其夏災即照秋災辦
理。○又議准。各省種植兩季之地。若夏被水災。
橫流衝決。不能復種秋禾。亦即與秋災無異。仍
准其照例加賑。○又議准。各處或遇風災。該督

撫等確實勘驗。如一時民食艱難。即於常平倉
穀內酌借籽種口糧。秋成還倉。免其加息。儻或
損傷大田。必需賑濟者。即具題請

旨遵行。○二十二年

諭。向來直省遇有偏災。本邑正佐不敷分辦。例委鄰封
州縣及佐雜試用等官協同查辦。原期體察周詳。毋
致遺濫。乃委員往往以例無處分。事非切已。不過扶
同具結。虛應故事。嗣後委員內如有查災不據實結
報。辦賑不實心挨查。草率從事。仍前翫忽者。該督撫
查明叅處。著為令。○二十三年

諭。向來外省督撫大吏。遇有地方水旱等事。往往委之屬員查賑。並不親身前往。經朕屢次訓飭。數年以來。頗知奮勉。但省會重地。督撫既經公出。而藩臬等又多相隨而行。無一大員坐鎮。殊非慎重地方之道。嗣後凡督撫同城省分。自可公同酌量。分留一人在彼坐鎮。即係巡撫專駐之省。亦當留藩臬大員。以資彈壓。○二十八年覆准。嗣後大員查勘災田。悉令輕騎減從。毋許騷擾地方。儻濫委佐雜。以致滋弊貽誤者。議處。○嘉慶二十年議准。各直省災歉地方。勘明分數。分別蠲緩錢糧。據實奏報。該督撫

接奉

恩旨後即飭知各該州縣立即張貼謄黃如有私行
隱匿徵課者嚴參重究係被災十分九分八分
者分作三年帶徵係被災七分六分五分者分
作二年帶徵其五分以下不成災地畝錢糧有
奉

旨緩徵及督撫題明緩徵者緩至次年青熟以後其
次年青熟錢糧遞行緩至秋成若被災之年深
冬方得雨雪或積水方退者須另疏題明將緩
至麥熟以後錢糧再緩至秋成以後新舊並納

○道光二十七年議定嗣後成災五分以上仍照例緩徵至五分以下勘不成災其中偶有一二村莊實應請緩者該督撫務另摺聲敘並將何區何圖及村莊名目明晰開列毋得籠統○

光緒三年

諭豫省本年亢旱成災民情困苦所有勘明成災之祥符滎澤獲嘉濟源原武修武孟縣洛陽孟津鄭州禹州偃師鞏縣新安淇縣延津封邱陝州靈寶閿鄉汝州伊陽武陟等二十三州縣均先行撫恤一月口糧其被災九分者極貧加賑三箇月次貧

加賑兩箇月。被災八分七分者。極貧加賑兩箇月。
次貧加賑一箇月。被災六分者。極貧加賑一箇月。
被災五分村莊。著賞給一月口糧。湯陰林縣等二
縣。著不論成災。分數極貧次貧。均賞給兩月口糧。
汲縣新鄉輝縣等三縣。著毋庸撫恤。仍各按成災
分數照例加賑。○又奏准陝西省。今歲二麥歉收。
約計境內西南北三面。尚有五六分者。東路渭
河以北大荔朝邑郃陽韓城白水澄城六縣。新
收三四五分不等。獨蒲城一縣。收不及分。現已
奏請緩徵。並撥糧石接濟。